

Declaración de Valdeavellano de Tera pa la defensa y reconocencia de los Usos Comunales y les ICCA n'España



Declaración de Valdeavellano de Tera pa la defensa y reconocencia de los Usos Comunales y les ICCA n'España

Los abaxo firmantes, nel marcu del conceyu del ICCA Consortium, celebráu en Valdeavellano de Tera, provincia de Soria, los díes 4 y 5 d'ochobre de 2013, y acordies colos pautos algamaos nel aconceyamientu específicu empobináu a constituyir el grupu de trabayu "**Iniciativa Comunes: Iniciativa pa la reconocencia de les Festeres Conservaes por Comunidaes Llocales**" p'afalar l'estudiu, defensa y reconocencia de les **Festeres Conservaes por Comunidaes Llocales (ICCA)** en España, **declaramos**:

1.- Que los **usos comunales y los sos bienes y derechos venceyaos** formen parte del Patrimoniu Cultural (incluyíu l'Inmaterial), Ambiental y Socio-económicu d'España. Que los usos comunales (pesca, pastos, caza, usos forestales, riegos y otros), foron clave tanto pa la sobrevivencia socio-económica del mediu rural y de la sociedá española en xeneral como pa la proteición ya integración d'aquellos grupos sociales y territorios más desfavorecíos, al igual que pa la xestión caltenible del territoriu, polo que tienen que s'estudiar, reconocer y defender.

2.- Que los usos comunales foron clave pa la conservación de la biodiversidá, paisaxes y ecosistemes n'España, lo mesmo que pa una xestión y conservación acionada de los recursos, servicios y valores que dan estos ecosistemes a la sociedá, siendo estos modelos d'aprovechamientos y los sos procesos ecolóxicos imprescindibles pa esplicar la bayura y diversidá del nuesu patrimoniu natural y cultural.

3.- Que, en xeneral, esti patrimoniu común sufrió históricamente gran númeru d'agresiones. Desamortizaciones, usurpaciones, municipalización, alienaciones y la falta de reconocencia social, xurídica, llegal y alministrativa y les males decisiones polítiques, supunxeron la perda irreparable d'un inmensu patrimoniu humanu, social, económicu, natural y cultural. Les agresiones siguen güei baxo estremaes formes p'arrampuñar a les comunidaes llocales la xestión de los usos comunales y los sos bienes venceyaos.

4.- que pese a estes agresiones, l'actitú histórica de los beneficiarios y titulares de los usos comunales, en defensa de los sos derechos, posibilitó que, güei, inda constituyan una forma usual, exitosa y esparcida de gobiernu del nuesu patrimoniu natural y cultural. Montes en mancomún, de socios, vecinales o comunales, cofraderíes de pesca o marisqueu, xuntes de pastos, de valle, y vecinales, faceríes, corrales de pesca, sociedaes de caza, "acequias de careo", parzoneríes, ledaníes y otros formes de gobiernu xestionen dellos millones de festeres con altu valir natural, económicu y cultural y son la espresión del empoderamientu y participación de cientos de miles de ciudadanos na xestión participativa, direuta, resiliente y caltenible de los recursos llocales.

5.- Que tienen que se reconocer, encontrar, promocionar y protexer caún de los tres pegollos básicos qu'han carauterizar los usos comunales: **Comunidá, Gobiernu y Conservación de la Naturaleza**, tal y como se describen na definición d'ICCA (Festeres Conservaes por Comunidaes Llocales) contemplada por dellos organismos internacionales. Nesti sen, hai que poner especial atención a preservar y promocionar los valires que, como norma xeneral carautericen los usos comunales y que los faen valiosos sobre manera pa la sociedá, ente otros, los de la caltenibilidad, l'adautabilidad, la multifuncionalidá, la integración de valires culturales, el repartu equitativu de los recursos y la xusticia social, la corresponsabilidad, los procesos participativos y l'empoderamientu de les comunidaes llocales.

6.- Qu'importantes organismos internacionales como'l Programa de les Naciones Xunies pal Mediu Ambiente (PNUMA), el Conveniu pa la Diversidá Biolóxica (CBD) o la Unión Internacional pa la Conservación de la Naturaleza (UICN) tán reconociendo cada vegada con mayor énfasis l'importante papel de les Fasteres Conservaes por Comunidaes Llocales (ICCA) na conservación de la naturaleza y la xestión caltenible de los recursos a nivel global. Sicasí, y pese a esto, n'España hai una grave falta de reconocencia del so valir dende les alministraciones públiques y una gran desconocencia per parte de la sociedá, siendo urxente nesti sen reivindicar el papel social, económicu y ambiental de les ICCA y el so potencial pa la conservación, el desendolcu del mundu rural y la sociedá en xeneral.

7.- Que la salú y el rendimientu económicu, social y ambiental de los usos comunales dependen de les persones que los xestionen y que son los auténticos especialistas na so gobiernu y funcionamientu. Estos homes y muyeres tienen de ser sofitaos socialmente pa que puean seguir desendolcando'l so llabor nunes condiciones xustes. Por tanto, la so participación nun gobiernu nes decisiones polítiques qu'afeuten a los comunales ye imprescindible de cara a afitar el so mantenimientu y caltenibilidad futura.

8.- Que, teniendo en cuenta lo enantes espuesto, pa poder garantizar la sobrevivencia de la bayura y variedá de formes de titularidá y xestión coleutiva existentes n'España y poder desendolcar el so enorme potencial y los sos valires venceyaos, ye precisu afalar nueves aliances y sinerxes, dende'l nivel llocal al global, encontaes na participación de base, l'empoderamientu de les comunidaes llocales y l'enfoque participativu ("d'abaxo a arriba"). Pa ello tien que se poner especial atención al establecimientu de canales de solidaridá recíproca ente les comunidaes que xestionen usos comunales, al empar qu'al establecimientu d'oxetivos comunes con nuevos axentes sociales, sobre manera nos campos de la investigación científica, la conservación de la naturaleza, l'enseñu, el derechu y la comunicación. A lo que se podría amestar l'establecer una alianza ente los usos comunales y les comunidaes urbanes, que potencie los estremaos llazos que les axunten.

9.- Qu'hai una sólida base científica que demuestra, como norma xeneral, 1. tanto la contribución histórica de los usos comunales a un desendolcu más caltenible ya igualitariu, como 2. la so importante contribución social, económica y ambiental güei, asina como 3. el so potencial pal desendolcu d'iniciatives que contribuyan a afrontar bona parte de los desafíos sociales, ambientales y económicos a los que s'enfrenta la sociedá actual y les xeneraciones futures. Consideramos especialmente destacable nesti sen la llinia d'investigación abierta pola doctora Elinor Ostrom, Premiu Nobel d'Economía en 2009, que demostró "*cómo los bienes comunes puen alministrase de forma efeutiva per parte d'un grupu d'usuarios*", rompiendo cola dicotomía públicu/privao al rescatar los valores de la titularidá coleutiva y desmontando asina la conceición tan arraigada, como dacuando interesosa, de que la xestión de la propiedá común ta empobinada pola so propia naturaleza al desastre.

10.- Que polos motivos enantes espuestos ha ser una prioridá de les propies comunidaes comuñeres, de les distintes alministraciones y la sociedá nel so conxuntu el mirar pola proteición y la reconocencia de dichu patrimoniu coleutivu sobre la base de los principios d'**inalienabilidad, indivisibilidad, imprescriptibilidad** ya **inembargabilidad**, lo mesmo que'l garantizar el respetu al derechu escritu y consuetudinariu de les comunidaes, la so reconocencia llegal dafechu, la so plena capacidá xurídica na defensa y xestión de los sos recursos y la participación afayadiza de los sos muérganos de gobiernu na toma de determinos qu'afeuten a esti patrimoniu. Nesti sen, les reformes llexislatives presentes y futures tienen de respetar los derechos históricos de les comunidaes llocales y la so autonomía na xestión del patrimoniu comunal. D'igual miente los usos comunales y los sos bienes y derechos venceyaos tienen que se xestionar de forma participativa y caltenible, col oxetivu de garantizar la tresmisión d'esti patrimoniu pa esfrute de les xeneraciones futures ensin nenguna mena d'amenorgamientu nos sos valires económicos, sociales y ambientales.

Roblen:



Mancomunidade de Montes Veciñais en Man Común de Castrove-Salnés



Federación Estatal de Pastores



MANCOMUNIDADE DE MONTES VECIÑAIS EN MAN COMÚN DO MORRAZO



Grupo de Estudos da Propiedade Comunal

Comunidade de Montes de Vilar de Triacastela